



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tiryimyim@aolima



tir yimyim

TAPAK 7



Bengaluru Open: Sumit Nagal nem Wild Card Entry agütsü



Republican Nikki Haley-i 2024 tir election nung tokteptsü maparen tenzükogo

VOL. XX NO. 124 (ADOK 124)

DIMAPUR RASEMNÜ (WEDNESDAY)

TSÜKLAI (FEBRUARY) 15, 2023

₹ 5.00

Naga yimten latettsü; ENPO dang nangzükba inyaktsü: JP Nadda

Kohima, February 14, 2023 Eastern Nagaland People's Organisation (ENPO)-i state yimten latettsü atema kanga meranga inyaka arur aser joko tatemlen kati arur, ano Eastern Nagaland dang nangzükba inyaktsü, ta BJP National President J P Nadda-i ashi.

Capital Cultural Hall, Kohima nung NDPP-BJP külem sentong ka nung Nadda-i "Prime Minister Narendra Modi-i Naga yimten latettsü kanga jangrar aser Union Home Minister Amit Shah-i iba atema kanga meranga inyaker" ta ashi.

Centre-i iba atema mapa aika inyakogo aser iba kuliji Nagaland Chief Minister Neiphiu Rio, Deputy Chief Minister Y Patton aser BJP president Temjen Imna Along nungeri ngua lir, ta paisa ashi.

BJP sorkari akokba tashi meranger aser joko tatemlen kati arur, ta Nadda-isa ashi.

Eastern Nagaland People's Organisation (ENPO)-i state balaka meshia takhangba agütsüba atema olen ka ashidang "ENPO-i Union Home Minister den jembitepa arur aser parnok dang nangzükba ama BJP-i inyaktsü" ta pai metetdaksü.

"Linük aser region taginübatem asoshi inyakba party ji BJP dang lir anungji onoki northeast region nungdakba ama yaria arur. BJP sorkari northeast region nung infrastructure aser health, education, road & agriculture sectors tajungba akümtsü atema sen crore meyrjang aika agütsüogo" ta Nadda-isa metetdaksü

"Election nung dang masü saka election sülen Prime Minister Modi teyari agi Nagaland tejakleni aotsü nangzükber. Nagaland nung Rio lenisüba kübok BJP-i taruba küm tejakleni anir aotsü nangzükber" ta paisa ashi.

BJP-i Eastern Nagaland Development Board tentettsü Taruba küm 5 tsüngda Nagaland nung mapa aika inyaktsü

Dimapur, February 14, 2023 (TYO): February 14, 2023 nü BJP National President JP Nadda-i BJP indang Nagaland Vision Document 2023 sayatsüogo.

2023 vision document ajanga taruba küm pungu tsüngda mapa aika inyaktsü nangzükogo.

BJP-i Nagaland Cultural Research Fund ka tenzüksü atema Rs 1,000 crores lezmüksütsü alizüng lir.

Ano, Kiphire nung Rs 500 crores endoka Saramati Cultural University lapoktsü aser iba ya Naga sobaliba ajungkettsü. BJP-isa kin tongtipang ajak indang benjung ajungkettsü atema Rs 100 crores agütsütsü.

Eastern Nagaland tesem renloksü atema BJP-i Eastern Nagaland Development Board ka tentettsü aser special package ka agütsütsü ta manifesto nung shia lir.

BJP-i Centre sorkar den külemi Nagaland nung district ajunga sütsü atema Trans-Nagaland Highway maparen tekaraba nung inyaktsü aser talisa iba ya Eastern Nagaland asoshi inyaktsü ta nangzükogo.

PM Kisan Samman Nidhi Scheme kübok küm nung Rs 6,000 agüja aliba Rs 8,000 kümtsütsü ta parnokisa shia lir.

Neidonuo Angami Women Welfare Scheme tenzüksü atema tanur tetsür ka asoba atema Rs 50,000 indang bond ka agütsütsü aser KG nungi PG tashi tetsür kaketshir ajak nem free-of-cost, quality education agütsütsü ta BJP-isa shia lir.

Tetsür college kaketshirtemi takok tajung anguba atema CM Free Scooty Scheme tenzüksütsü ta manifesto nungsa lir.

BJP-isa kümshia Ujjwala beneficiaries ajak nem LPG

cylinders anana agütsütsü aser taruba küm 5 tsüngda self-employment lakh 2 adokdaksütsü ta parnokisa nangzükogo.

Nagaland Skill Development University nem Rs 500 crores agütsütsü aser iba ajanga lanurtem nem training agütsütsü ta BJP manifesto nungsa shia lir.


Class 10 aser 12 nung takok tajung anguba kaketshir ajak nem digital tablets agütsütsü aser Kohima o Mon Medical College tem mapang shitak nung renemtsü atema parnokisa nangzükogo.

BJP indang Nagaland Vision Document 2023 nungsa Jal Jeevan Mission indang mapa 100% inyaktsü aser 2024 tashi nung Nagaland nung aliba kilen ajak nem tap water agütsütsü aser yimtsüng ajak State aser National Highways den sendakteptsü atema lenmangtem yanglutsü.

NATIONALIST DEMOCRATIC PROGRESSIVE PARTY (NDPP)

Facta non Verba

- PROMOTING NAGA SOFT POWER
- PUSHING CREATIVITY & INNOVATION
- PROPELLING BRAND NAGALAND



NAGALAND - TOWARDS A STATE OF EXCELLENCE



PUBLISHED BY : NDPP MEDIA & COMMUNICATION COMMITTEE.

FOLLOW US @NDPPOFFICIAL



"Nai Election nung sen meshia senzübaji tarutsü putu tashi ne dak jakzü meshimetsür adoktsü lenpir mesük" Anonymous

- Ungma Baptist Arogo Laishir Telongjem Clean Election Tayongzükba

Delhi Ao Kaketshir Telongjem Fresher's Day mungogo



Dimapur, TSüklai/February 14 (TYO): 31 Buba Delhi Ao Kaketshir Telongjem (DAKT) Fresher's Day Nagaland House, New Delhi nung February 11, 2023 nü kanga takok ngua mongogo.

Iba sentong nung tongti tejaoker Wt. Limatula Yaden, IRS, Joint Secretary, Tax Research Unit, Department of Revenue, Ministry of Finance liasü aser tongti O jembir Wt.

Sentisungla Longchar, Assistant Professor of Psychology, Lady Shri Ram College For Women, University of Delhi liasü.

India yimtiba, Delhi nung küm shia asen Aoer kaketshirtem university, colleges aser institution balala nung azungtsü, training balala agitsü aser mapa inyaksü jenti arur. Parok anepalutsü aser lenmang balala nung yaritsü asoshi DAKT ya kanga tongtipang tentet ka lir.

Küm shia DAKT-i achayanga tasenpur pela-a agizükba sentong tajung ayonga amonger.

Iba sentong nung tongti o jembir Wt. Sentisungla Longchar-i lanurtem atema tekolok anema alibaren indang jembir aser Delhi nung lai ajangshia arubatem lemsatsep. Lai Freshers dang professors den sensaksemtsü aser tayongzükba jenti ajuruaka meranga azüngtsü ajungshi.

Nisung ka takum nung alizing ka ayutsüla aser pei takum liyonga aotsü atema tejangraba alitsü asoshi lai-isa ayongzük.

Kasa sentong nung tongti tejaoker Wt. Limatula Yaden, IRS ajanga jembidang la Delhi nung kaketshir ka ama azüngba mapang nungi lia aruba indang otsütem menungra jembir. Maneni lai lanurtem dang ajemalutsü indang nenshia ashi. Sentong nungsa DAKT tir

Pangertoshi Walling-i sobaliba wazüka ayutsü indang jembir aser Delhi Ao Senso Telongjem tir Er. N Ajungba Jamir-i kaketshirtem dang talila awaloka oa merangtsü ayongzük.

Iba sentong nung DAKT nung kaketshir tasen 32 aden aser parnok tenung nung Sentikala Imchen-i o jembir. Iba sentong tembangba 'Metsoben Naknora' omen nung ajemdaker sentong ka agia liasü.

DC Dimapur ajanga Empanelled Hospital tem sangdong

Dimapur, Tsüklai/February 14 (TYO): Chief Medical Officer, Dimapur ajanga sangdongba aser Directorate ajanga tuyuba ama State General Election, 2023 indang Polling Personnel ajunga dang Dimapur, Chumoukedima aser Niuland district tem nung parnok shirangba anepalutsü atema cashless treatment asoshi empanelled hospital yamai alitsü, ta Deputy Commissioner & District Election Officer Dimapur, Sachin Jaiswal, IAS ajanga metetdaksü. Empanelled Hospital tem yamai

- | | |
|-----------------------------------------------------------------------------|--------------------------------------------------------------------|
| alitsü: | 8131812445. |
| 1. Assam Rifles Composite Hospital (GOI) Contact No. 8787766921. | 6. Olive Christian Hospital & Research Center (Private) 7005373705 |
| 2. Christian Institute of Health Science (Private) Contact No.8974057455. | 7. Eden Medical Center (Private) Contact No.7005635511. |
| 3. Faith Hospital (Private) Contact No.7005502124. | 8. District Hospital Dimapur (Public) Contact No. 9436006239 |
| 4. Nikos Hospital & Research Center (Private) Contact No. 9436004198. | 9. PHC Kuhuboto (Public) Contact No. 9856589255. |
| 5. Nagaland Multi-Speciality Health & Research Center (Private) Contact No. | 10. PHC Niuland (Public) Contact No. 6009015353 |
| | 11. CHC Medziphema (Public) Contact No. 6009870678. |

Lanurzünger mapa mangu aliba tebilemtsü repringtsü: Moatoshi Longkumer

Dimapur, Tsüklai/February 14 (TYO): Zünger mapa mangu aliba lanurtem Nagaland nung timba lir, anungji lanur nem tashi agütsütsü ya kü indang teinyaktsü tongtipangba asütsü, ta Dimapur-II nungi tang teinyakdak MLA aser NDPP candidate Moatoshi Longkumer-i ashi.

Mongulbarnü Indisen ground nung 'unity youth rally' ka nung jembidang, lanurtem mapa mongui aliba tebilemtsü koktetsü atema lanurtem nem self-employment atema sector balala nung skill development agütsütsü, ta Moatoshi Longkumer-i ashi.

Dimapur ya yimti temürek kümdaktsütsü kü nükjidong lir, aser yangi alir ajak yimjung nung kati ka den yaritepa lidaktsütsü kü nükjidong lir. Ajisüka opposition MLA ka ama inyaka aruba ajanga iba nükjidong mataloktet. Tanü ni NDPP nung dena lir aser shimtetra asen mangdang asangsang kümdaktsütsü merangtsü, ta pai ashi.

Nüburtemi ni shimtetra Dimapur-II constituency kübok colony ajak nung lenmang

yanglutsütsü, koba nübur ajunga taginüba lir, ta ashi.

1980s aser 90s mapang Nagaland nung temesepba mozü tebilemtsü agi sünger liasü. Aser tawa-tanü state nung iba tebilemtsü temai adoker, aser ibaji koktetsü asoshi nüburtemi shilem agitsüla. Iba temesepba mozü achi-ajemba tebilemtsü koktetsü asoshi colony shia 'watch group' tentetsü, ta Moatoshi-i ashi.

Mapang ka pa den tokteper alising aser tangbo tembar tajung kumer alising Supu Jamir-i telemtetba tulu aser tajung agia nomination meyiba agia lungjemer election nung pa yaritsü lemtetba atema pai temolung taroktiba nungi pelaba lemsatempa liasü.

Iba sentong nung Supu Jamir-ia pa indang nomination meyiba agitsü February 10 nü lemtet aser Dimapur-II atema bendanga agütsütsü telemtetba agia liasü, ta ashi.

Paia nübur ajak dang teka amteper külemi aruya aliba election nung yaritepa inyaksü ayongzükba liasü.

WENN ajanga digital workshop ayongzük



Dimapur, Tsüklai/February 13 (TYO): Women Entrepreneurs Network Nagaland (WENN) ajanga Nagaland nung tetsürtem entrepreneur atema Digital Awareness workshop ka February 11, 2023 nü Educentre office Dimapur nung ayongzükba ali.

Iba workshop ya MMB Cyber school den longjemer aser Educentre School of Business-ia yaria ali. Workshop nükjidongji, tetsür entrepreneur-temi parnok business tenzükdang Branding, digital marketing, Product Packaging aser Labelling koda tongtibang iba indang angatetdaksütsü atema liasü.

Iba sentong nung sentong

lenir Alemjungla Jamir, WENN Chairwomen liasü. WENN inyakyim indang lai tongmelang agi shia liasü, iba ya entrepreneur mapa indang osangtem aser tajangshibatem, training agüja sayuba, tetsür tashi indang sayua metetpelaba sapang ka lir, tangtipangsa Nagaland nung aliba tetsür entrepreneur-tem nem ola agütsür. WENN nükjidongji Nagaland nung aliba tetsür entrepreneur-tem atema inyaksangshitsü sadema agütsütsüba lir. Iba nung ajemdaker, lai iba workshop nung adenertem ajak jangraa adentsü aser iba takok ngudaktsütsü atema ajungshia liasü.

Shisalen sayur Namang T. Chang, CEO- MMB Cyber school ajanga Branding, cyber safety & security aser digital Marketing tongtibang indang sayua liasü.

Shisalen sayur Imtisenla Jamir, Project Director- MMB Cyber School ajanga Product Packaging & Labelling indang rasaa shia liasü. MMB Cyber School ya, Modern myriad Branding Pvt.Ltd kübok non-profit Institution ka lir.

Kewengule Therie, WENN Finance head ajanga tarurtem pelaa agizük aser iba sentong tembanga Vekuthulo Vero, WENN Operations head ajanga melepzüng o jembia liasü.

Mokokchung DC ajanga training agitsü anogo sangtong

Dimapur, Tsüklai/February 14 (TYO): Deputy Commissioner aser District Election Officer, Mokokchung, Shashank Pratap Singh IAS ajanga, 21-Tuli, 22-Arkakong, 24-Angetyongpang aser 29-Jangpetkong Assembly constituencies nung Webcasting atema Data Operator ajak dangi mezüng Mock drill February 17, 2023 nü Town Hall, Mokokchung nung anepdang 9:00 ako nungi

tenzükba alitsü, ta osang agütsü.

Ano 22-Arkakong, 23-Impur, 24-Angetyongpang, 25-Mongoya, 26-Aonglenden, 27-Mokokchung Town, 28-Koridang atema Data operators Webcasting lemzükba alirtem asoshi tanabuba Mock drill February 21 2023 anepdang 9:00 ako nungi tenzükba Town Hall, Mkg nung altsü, aser iba nung material-tem agüja itemji amshiyim sayutsü.

Changtongya Town nung ki ka menakreparongdok

Changtongya, February/ Tsüklai 14 (TYO): Electrical Ward Changtongya Town nung Sangtennü nikongdang 4:00 ako meta ka nung ki ka nungi mi adoka iba ki ajunga menakrepa rongdok.

Iba osangbeneri ki kibur I. Sari Jamir GB den asüngdangyaba mapang ashiba agi, par kidang kinüngtsü dena den semchir ana alir, saka ki nungi mi adoka arongba mapang

parnok shinga kidang meliasü. Paisa iba mi lendong ya electrical short-circuit nungi adok asütsü ta shia liasü.

Iba ki arongba osang angashitepa nübur jenti sentep saka tsükla mapang tzü agi anüngba den ano fire brigade anasa maliba ajanga kiojen oset kecha magizükteki ajak rongrep. Iba kironng lentong nung senpak lakh 20 shi tesama angu ta ki kiburisa shia liasü.



Yingli college, Longleng nung February 13,2023 anogo nung 56 buba A.D.Shroff Memorial Elocution competition sentong agiba noksa ka yangi angur.



Delhi Development Authority (DDA)-i New Delhi kübok Mehrauli tesem nung ozüing alema yanglua aliba kiojentem raksatsüyonga aoba noksa nung angur.

Tejas tayimtsü ayoktsü Egypt, Argentina den jembishinüdar

New Delhi, Tsüklai/February 14 (Agencies): India nung yangluba Tejas light combat aircraft (LCA), Egypt aser Argentina air forces dang ayoktsü atema India jembishinüdar. Bendanger shishilembadak ajemoktsü aser defence exports ajungkettsü atema linük rangloker inyakba mapang tang iba jenjang agidar, ta Hindustan Aeronautics Limited (HAL) mendenbuba CB Ananthkrishnan-i Mongolbarnü Aero India-2023 sentong nung o jembiba mapang ashi.

Egypt-i tayimtsü 20 aser Argentina-i tayimtsü tasen 15 nüngdakba lemsatepa liasü, ta pai ashi.

"Egypt-i, local aerospace ecosystem ka yanglutsü atema tejangraba aliba lemsatepogo. Iba dak sendakba nung onoki teyari agütsütsü. Argentine Air Force nungi team anati HAL semdangogo aser LCA anidangogo," ta Ananthkrishnan-i ashi.

HAL-i, LCA Mk-1A variant alizüktü atema linük ananem ya maongka agütsüogo.

Hombarnü Aero India airshow lapokba sentong nung Ato Kilonser Narendra Modi-i, taoba küm ti, teku tsüingda defence sector melenshia aoba nung linük nung yangluba weapon system tem rongnung LCA-a densema lir ta ashi.

Ananthkrishnan-i ashiba agi, Malaysia dang fighter jets tasen ayoktsü atema inyaktepba nung Korea nunger tayimtsü yanglurtemi HAL ajateter alitsü akok.

Indian Air Force (IAF) chief

Air Chief Marshal VR Chaudhari-i, Hombarnü Yelahanka airbase nung tayimtsü sayaba mapang LCA aniogo. Tayimtsütem bendangertem dang ayoktsü atema India-i tang takokba tashi lenmang bushidar.

Air Force-isa, tarutsü nung combat tashi ajungkettsü atema version tasentem yangluyonga aotsü atema sentong lir.

LCA project tangbo lenmang shidak nung odar ajisüaka HAL indang sentongtem aika bilemba mapang shitak nung inyakyonga motetba ajanga armed force tem tanga lenmang bushitsüsa kümogo, kong basic trainer aircraft, intermediate jet trainer, aser LCA project densema lir.

IAF-i 2016 küm July ita tayimtsü ana alia mezüngbuba LCA squadron aniteta liasü. Iba project ya Soviet-origin MiG-21 fleet melentsü atema 1983 küm sanction süatoker liasü.

IAF-i, mezüng yangluba LCA 40 induct süogo aser 2021 küm improved Mk-1A variant 83 order süogo aser tang iba tayimtsü tasenba LCA Mk-2 order asütsü atema sentong yangludar.

Aero India-2021 nung defence ministry-i, IAF atema LCA Mk-1A 83 yanglutsütsü atema sen crore 48,000 alang contract HAL nem agüja liasü. Mk-1A tayimtsü mezüngbuba ya air force nem 2024 küm February ita agütsütsü. Iba sülen tanungba tayimtsütem ya 2029 küm tashi nungbo agütsütsü, ta HAL ketdangsurtemi metetdaksü.

"LCA Mk-2 mezüngbuba 2024 küm December ita tashi

nungbo yangluzüka 2025 küm nungi yimdaksütsü imlar," ta HAL mendenbubai ashi. IAF-i, Mk-2 tayimtsü 108 (squadron trok) order asütsü imlar.

Sorkari taoba küm LCA Mk-2 yanglutsü atema temelaba agütsüogo, koba tarutsü nung anüing nung raratsü atema kanga tongtibang akümtsü.

2025 küm tashi nungbo USD billion 5 alang defence exports ajangzüktsü India nükjidong lir. 2022 küm November ita Indian defence firm Kalyani Strategic Systems Limited-i, tembar linüktem dang USD million 155.5 alang artillery prangbong ayoktsü atema order agizüka liasü.

Philippines-i BrahMos missile tem aser Armenia-i Pinaka multi-barrel rocket launcher India ket nungi alizüktsü atema order asüba sülen iba order ya agizüka liasü.

Kasa mapang nung HAL-i, Philippines dang advanced light helicopter ayoktsü sentong yangludar, ta ketdangsurtemi ashi. 2020 küm December ita Union Cabinet-i, tembar linüktem dang Akash missile systems ayoktsü temelaba agütsüogo.

India nung hadirtem yangluba jenjang ajungkettsü atema Defence minister Rajnath Singh-i Deobarnü ashiba agi, India-i bendanger linüktem nungi hadir aser system balala bener aruya aliba tali nokdangtsü akok aser item hadirtem ya linük nung yanglutsü, ajita asünungdang defence sector tali ajungkettsü aser tangar dak metaloker malitsü.

PM dictatorship temaba jenjang tongogo: AAP

New Delhi, Tsüklai/February 14 (Agencies): Delhi aser Mumbai kübok BBC indang office tem nung Tax survey operation dak sendakba nung Aam Aadmi Party (AAP)-i Mongolbarnü Centre aitsüogo aser ashiba agi, Ato Kilonser Narendra Modi dictatorship temaba jenjang tongogo.

Saru shidak magütsüba dak sendakba nung bushisüingdang nung shilem ka ama I-T department-i Mongolbarnü meita aoba sentong ka ayongzüka agiogo, ta ketdangsurtemi metetdaksü.

Hopta ka ana tejakdang BBC-i "India: The Modi Question" ta nüngja agütsür documentary shilem ana sayaba sülen tang iba jenjang agiogo. Centre-i iba series indang video dak sendakba nung YouTube video tem aser documentary indang link lemsatepba Twitter posts tem ajak nokdangogo.

Delhi, Mumbai BBC office nung I-T bushisüingdang dak sendakba nung teka amteper inyakdar, ta corporation-i ashi.

"Modi ji nü dictatorship temaba jenjang tongogo," ta AAP Rajya Sabha MP Sanjay Singh, shiba party indang

national otongdar lir, pa Hindi nung tweet süa liasü.

"Mezüngbuba BBC documentary nokdang aser tang parnok indang office meita aoer. Modi ji ya tamatok, Hitler indang dictatorship-a tatembang ka dangi aruogo. Nü dictatorship-a tatembang ka dangi arutsü," ta AAP lenir-i ashi.

TMC MP Mahua Moitra-i, IT-i BBC dak jenjang agiba ya tembangba sülen 'Mr A' dak tenzüktsü asü masü, ta asüingdang.

BBC documentary ya Modi Gujarat indang chief minister asüba mapang 2002 küm mepetmesü tulu adokba indang lir aser Ministry of External Affairs-i iba documentary ya tamendakdak makaba propaganda ka aser "colonial mindset" sayuba ka lir ta shia aitsüogo.

Documentary series sayaba sülen India nung British Broadcasting Corporation (BBC) ya nokdangtsü atema ken o benokba Supreme Court-i taoba hopta magizük aser iba ken o ya mashiyimi angatetba aser tamendakdak maka ta shiogo.



Thiruvananthapuram nung Valentine's Day nü helmet mesemi two-wheeler anishirtem atema Kerala Police-i road-safety awareness sentong ka ayongzüka katsüba mapang police kati naro agütsüba noksa nung angur.

Foreign Secy. Vinay Kwatra-i Bangladesh semdangtsü

New Delhi, Tsüklai/February 14 (Agencies): Foreign secretary Vinay Kwatra-i February 15 aser 16 nü Bangladesh semdanga linük ana tesendaktep lepa reprangshitsü aser lenla balala nung tesendaktep tasen yanglutsü atema lenmang tasen bushitsü.

Bangladesh Foreign secretary Masud Bin Momen-i jaokba sülen Kwatra-i Dhaka semdangtsü, ta external affairs ministry sangdong ka ajanga Mongolbarnü metetdaksü.

Kidanger linük tongtibangtem den tesendaktep meraksai ayutsü atema India rangloker aliba nung shilem ka ama pa Hombarnü nungi tenzüka anogo ana atema Nepal semdang tenzükogo.

Bangladesh semdangba mapang Kwatra aser Momen nati lenla balala nung linük ana tesendaktep lepa reprangshitsü, kong yimden yimsüsüba aser security ken o, tzü, shishilemba, investment, power aser energy, defence, connectivity aser sub-regional

tesendaktep densema lir, ta external affairs ministry-i ashi.

"India indang 'Neighborhood First' policy dak ajemdakar Bangladesh semdangtsü," ta ministry-i ashi.

Bangladesh ya India indang development partner tongtibangtiba lir aser linük ana temeket nung shishilembaba tsütsü partner tulutiba lir.

Kwatra-i Bangladesh semdangba ajanga linük ana tsüingda tesendaktep tajungba küma yanglushitsü aser lenla balala nung tang sendakteper inyaka aliba tali tajungba kümdaksütsü, ta ministry-isa shisem.

Kümtem tsüingda India aser Bangladesh nati arrtsü aden rail link tema asüngsashiogo aser West Bengal aser northeastern state tem nungi arrtsü aden bus service dena tenzükogo aser iba den ayong ajanga sendaktepsü atema jenjang agiogo.

Defence dak sendakba nung Bangladesh-i, USD million 500 alang military osettem credit agi agi tenzükogo.



Lethpora nung CRPF ADG Daljit Singh Chawdhary aser Armed Forces personnel temi 2019 küm Pulwama district nung pei temang nung bomb alenoker pokdaksür kati tepsetba sepaitem nem aküm tetushi agütsüba noksa nung angur.



TIR YIMYIM

YIMOBILEM (EDITORIAL)

DIMAPUR RASEMNÜ, TSÜKLAI (FEBRUARY) 15, 2022

Sarasademertenzüker aser tembanger

Election mapang ya vote yokang teyok mesüra vote aliang tali, mesüra tashiyim amshiang tamshi senden sentong ajak sarasademertenzüker aser sarasademertemer. Tetezü, asenok ya Khristanbo Khristan aser Tsüngrembo tsübur ta sayur. Asenok majungyonga aser peisasa pei mazüoktetyonga Tsüngrem dang tashi aser takok meshia sarasademertsü mamaba nungji asenok dak topur ajung ka sayur. Ashiko, iba jagi Tsüngrema pelaa alitsüa akok. Ajisüaka, shisabulutsü kaji, asenoki sarasademertaji masü saka asenoki sarasademert kechi inyaker ta asübaji lir. Atangji, tang asenoki election nung inyakba mapatem yabo sarasademert inyaktsüla mapatembo masü. Sarasademert kodaser vote alilen jajatsü ? Kodaser sarasademert lanurtem nem yi aser drugs chidaktsü raratepdaktsütsü ? Kodaser sarasademert nisung tamajunger bushia prangpong injang aser bomb amuoktsütsü ? Kodaser sarasademert kimunglumung yoker-ang sentem tulu agi sen apua vote alia election nung adoktsü merangtsü ? Kodaser sarasademert asen kija khen, kibong ajunga khen aser ano telok tentetter khen ta aseben pezüben candidate dang asen vote ayoktsü ? Asen vote ayokbaji asen ayoker. Asenokbo Tsüngrem dang ni aser ozü kibong vote ya sen kwi agi shiba dang yokla (?) ta asüngdanga sarasademert asü ? Mesüra asenokbo par yimtak aser par kiyong nung sen kwi endokla ta sarasademert ? Asenok taküm aser loktiliba ya bilemdangra, shingaia asenok kangshia Khristan mekümdaktsü aser tanüa Khristan masü tanga tamangba yimsü amangnura shingaia menokdangert. Asen lima aser asen loktiliba nung tajung kaji aji lir. Ajisüaka, asenok dak majung kaji, Khristanbo süner saka tamakok aser sensak maremer, iba jagi tenüngbo Khristan saka Khristan anemba telok nungi temoatsü agitsü merangteper. Yisu Khrista dak amangba nung asen nungdak ajak ataloktsütsü tenangzükba lir saka ano Yisu Khrista sülen anidaker Khristan taküm ka akümstsü atema mezüng ochi nung aliba ajanga ajuruba timtem, maksü aser tamakok aremtsüla. Ajisüaka, tanü asenok election sentong ajak sarasademertenzüker aser sarasademert atemertemi Khristan-bo süner saka ochimashi agi takok angutsü meranger. Asenok asoshi lendongji yangji keta lir. Aji oda, asenoki Tsüngrem dang "nü mulung sang" ta ser sarasademert atemer asünungji, Pai asen akaba ajak laludaktsü meshimetsü kumdaktsü nungbo koda ? Pai asen akaba dak tali endokdaktsü shisabolu agi arishi tatsüba kumdaktsü nungbo koda ? Kasaji, aseni vote ayokba senji asen atema tashidak aser chirnurtem atema atakartem aküm nungbo koda ? Election nung pei vote ayokba agi jangratema takar küma aliba nisung kar dang ajurura asüngdangang ? Sarasademert tetezü Tsüngrem majangi kecha meinyakner, anungji Tsüngrem dang nungi temelaba meshir. Ibaji asenoki angateta inyakra, atangji, sarasademert ajanga tashi tasen aser temulung lemtet tulu Tsüngrem nungi angutsü. Tsüngrem dangbo asüngdang saka Pai memelaba mapatemang inyak ta asüba dang nungi tamasayongi masüdangang tajungba. Tetezü sarasademert ochimashi aser tashiyim mapa inyaktsü agibo sarasademert masü ser inyakang tajungba. Election mapang nisung aika yi jemteper tebur kümteper, ajisüaka shitakba alima tongpangbo parnoki makoker, iba jagi election mapang teburchitem election temerbo lapi kümer tangar kiküma majangtet alir. Ano election mapang shiner aser mangdang angur aika adoker aser parnoki adoktsü madoktsü shiner. Item shinertem jagi candidate aika anak auyi kümstsüogo. Iba tashiji asenok Khristan-temi benshir. Khristan asütsüba ya temela masü, tasak, anungji election mapang nung dang masü tanga mapang nunga asenoki Khristan memesük alir, ibayongji tangar yimsü amangertemi asenok akhüm metsübur. Ashi, asenoki sentong ajak sarasademertenzüker aser sarasademert atemer ta asüba ama, teti asen mapa ajak nung Tsüngremi mulunglen anidak asübo, asenokang tangar tamangba yimsü aniba telok (party) nung masü tangarjiang asenoki aniba telok (party) nung denla.

OLEMSABANG

" ELECTION YIMYIM "

~ L. Kika Pongener.

Oh...Election, ozü Naga nunger tulur-tilar, takar-sensaker ajaki na yongyar, Yimsusur-ia yongyar, kijung lanur-ia yongyar aser aiur-asangur-ia yongyar, Arogo tenzükertem, Putirtem, laishirtem aser arogopurtem ajungai yongyar, Ozü Naga nungerbo rongsen aser supokrem matsüngdang shinga mejenpur.

Oh...Election, nai küm pongu shia ozü Naga lima raksatsü aser lemsatsü, Nai yimden, arogo aser loktiliba ajak nung teraksa aser telemsa adokdaktsü, Nai kin-kidong, meposanger, yimtsü-yimer tsüngda meputep adokdaktsü, Nai tsürabur, adianu aser pur-medemer tsüngda nunga tsükchitep dendaktsü.

Oh...Election, nai ozü Naga lima nubur Sodom Gomora lima ama menentsü, Kodang na arudir, nai teti temesepba chiyungtsü yi, drugs taluposa bener arur, Kong na lidir idakji teti chidiyungdi, japojar, nuktapangda mapa agi sunga lir, Na alidak teti rongrong, raratep, mangatettep aser mepetmesu agi sunga alitsü.

Oh... Election, nai ozü Naga nunger senyong pei temeden ayoktsü ajungshir, Esau-i aya marem nung chi auso ka yong pei tambu senmang yoka achiba ama, Posu-i aya marem nung pei techanu dena yoka achitsü apayua mebilemba ama, Ozü Naga nungeri tanü poksung sen ishika mechi pei temeden vote yoka achir.

Oh...Election, na kodang arur ozü lima nung azü tokshiba mapa aika ataloker, Kain-i tenu Abel tepsettsü mapayuba ama adianui pei adianu tepsettsü mapayur, Ozü limai na arur külen tashitemeteter kenshi-oshir senso tajung aika tepsetogo, Ozü lanur tajung, lennir tajung, yimsusur tajung aika dang leper nung rema lir.

Oh...Election, nai ozü sorkar tenzükertema dena ochimashi inyaktsü ajungshir, Nubur meyong rongsen agi pei nuja meyong kümer agitsü temulung uludaktsü, Nai ozü lima nung terenlok mapatem aika meinyaki anena ayutsüsa kumdaktsü, Ozü lima terenlok inyaktsüba sen agi vote alitsüba mapa nungang amshidaktsü.

Oh....Election, na marudang ozü lima iba amai teraksa aser tepenja makai liasü, Ozü Naga nunger ochishir yimden yimsusur aser lokti lennirtem aika dang liasü, Pei asoshi mebilemer, pei ajungtsü mebushir, nubur meimba yimsusur aika liasü, Saka na arur külen item yimsusur aser lennir tajungtem ajunga nai raksatsüogo.

Oh...Election, nai ozü Naga lima yimsusuba bangdak sabanga dena meyipsatsü, Nai ozü yimsusur sen agi tebang nembangtsü aser supokrem agi tenuk pokdaktsü, Tsüngrem lar dena Election kangla nung asonger ochi poküm nung menokdaktet, Khristar arogo-a dena Election shisa-rama tzüchi nung asonger ochi ola madoktet.

Oh...Election, Ozü Naga nungeri ozü Naga limaji 'Dry State' ta yimyim ayim, Saka nai iba yimyimji ali tur remtsüogo, amajok aser tamakitsü kumdaktsüogo, Kechiyung kodang na arudir alima kinuk-kisang ajaklen 'Yi Bottle' agi asünger, Ozü lima Khristan lima agi Hindu-Muslim lima danga tamajungba kumdaktsü.

Oh...Election, ABAM & NBCC-i anir, Election meruka agitsü yimyim ayimer, Joko ozü Naga lima yanglushitsüba nutsüng-nubur ajaki mulungteter ola adoker, 2023 küm Election nungbo ochishia merukmeruka agitsü pangzünga renemteper, Naga nunger ajunga kenpang-opang ka sür 'Clean Election' yimyim ayimoktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Impur nung Sensaksem aser Sarasadem sentong agi



February 14, 2023 anogo nung tang agitsü aliba Nagaland State general election nung tokteptsü pur Aor candidate-tem ajak ABAM-i Impur nung jaoka sarasadem mapang agiba sülen candidate-tem den ABAM lenirtem külemi agiba noksa ka yangi angur. General election shia ABAM-i yamai inyaker.

Impur, Tsüklai/February 15 (TYO): Impur nung ABAM ajanga ayonga arua aliba 14 Buba Nagaland Legislative Assembly Election nung Aor Candidate tem den Sensaksem aser Sarasadem sentong kanga takok ngua agiogo. Iba sentong nung ABAM Sanen Luden, ABAM Clean Election Movement Committee aser Candidate-tem 23 tena liasü. Iba sentong ya Candidate tem asoshi Tsüngrem nungi temoatsü meshia sarasademba den ano asen Naga nung ajak tiptema lia aotsü asoshi nenok dak shilem tulu ka keta alinungji ochishia nübor meima

Tsüngrem tsübua asen tamangertem kümzküka ayutsüji ner shilem ta ajungshiba sentong ka liasü. O jembirtem ajanga ayongzükbaji, tanü asen nübor tem koda masüba tensa-i kishi nung akoshidar, anungji item tebilemtsü nungi kümzküka ayutsüji nenok khuret lir ta ajungshi. Maneni nenok ya ABAM züngsem tajung kaka aser Tsüngrem chirtem asünung, kecha nunga tamang jenjang raksa temulung memeyipsai asen nübor temeden asoshi taküm bendanga agütsür süang aser kechi Tsüngrem tsüngdang tagizüktetsü lir aji inyakang ta

akang akanga ajungshia liasü. Tatem nung Rev. Dr. Mar Pongener Executive Secretary, ABAM ajanga Daniel 4:17 nung ajemdaker "...Tematibai meimchir yimli madak yimsü asür, aser aji Pai mulungba nem agütsür..." anungji, tang terenemshiba mapang nung Pai mulungba angateta liang ta ayongzüka. Paisa ano Tsüngrem meteni meimchir inyaka ji tamakok nung atemer, anungji teti Tsüngrem dang asüngdanga Pai mulungba angatetsü meranga liang ta tayongzüka tulu agütsü. Tatem nung Candidate-tem ajak asoshi sarasadem tajung ka agia iba sentong tembang.

Pakistan: Khrista dak amanger tetsür ka pur oa tashiyim agi tamangba yimsü melendaktsü

Lahore, Tsüklai/February 14 (Agencies): Pakistan nung Arif Gill'er arishi küm 15 tain jala, arishi küm 60 tain Muslim nung kati pur oa Islam tamangba yimsü agi meyipdaksü. Iba dak sendakba nung ita anashi lir Pakistan nung police-i ken o ka benokogo.

Sitara Arif, shiba dang Saira ta ajar, la December 15 nü Faisalabad kübok Yousafabad tesem nungi Rana Tayyab-i pur ao, ta Saira tebu Gill-i ashi. Tayyab ya Naila Ambreen kinungbu lir, shiba Muslim government school principal ka lir aser Saira ya par kidang kilir ama yaritepa liasü.

"Ozü jala pur aoba ken o benoktsü atema ni police station-i ao, ajüsüa parnoki ni ashishiba magizük aser ni tashiyim agi mintok," ta Gill-i ashi, shiba mata mabensar ka lir.

Paisa, pai Tayyab anema ken o benoktsü aiben merangdangogo, saka police-i pai ashiba mangai liasü.

"Madam Naila ya sorkar tenzüker ka lir aser la aser la kinungbo na prongla police den kanga junga sendaktepa lir aser ibayongji ni mepeshiba magizüki liasü," ta Gill-i Morning Star News dang ashi.

"Ken o jang dang ashishitsü atema maksütsüba den amokmerenba sülen ni iba ken o toktsü aser özü jala kodanga mangutsü ta bilema liasü. Joko ita anashi kinungtsü künati özü jala mongudang aser la koma ali iba indang osang kecha mangazüki lir. La onok dang nungi bener aoba anogo nungi

tenzüka tang tashi onok koma temulung züreber aji Tsüngremi dang meteta lir," ta ashi.

Gill, shiba Catholic ka lir pai, par kibong kanga sensakba ajanga lar jala Muslim nung ka kidangi teyariteper ama yoktsüsa aküm.

"Ni kecha aazüka bener maruteter anungji kinungtsü aser jala nati kibong mesütsü atema kilir ama inyaker. Onoki özü jala takok tashi kümzküka ayutsü merangogo aser la dang nungi ponguben agi tinba nisung kati la dak tenük yoktsü ta onoki bilema maliasü," ta paisa ashi.

Sitara ya Gill'er tanurtem rongnung tantsüla lir.

Gill, okatsür aser Minorities Alliance Pakistan mendenbuba Akmal Bhatti-i ashiba agi, Gill timtemba indang osang pai February 3 nü angashi aser idangjisa par kinungertem Faisalabad indang regional police chief den ajuruteptsü atema anepalutsü. Police temi jenjang shidak magiba ashishia parnoki First Information Report (FIR) ka tangsa tang benoktsü khanga liasü.

Regional police tetolakbai tetuyuba agütsüba sülen Tayyab anema February 4 nü Madina Town Police Station nung ken o ka benokogo aser police temi pa aputsü aser Sitara kümzkütsü atema bushisüngdang tenzükogo, ta Bhatti-i ashi. Iba ken o ya Pakistan Penal Code kübok Section 365-B dak ajemdaker benokogo, koba nisung pur aoba aser kangshia kibong kümdkaktsüba dak sendaka lir.

Bhatti-i ashiba agi, Police temi Yousafabad nung Tayyab'er ki meita aoba mapang pa kinungtsü Naila Ambreen-i ketdangsurtem dang pa aser Sitara na kibong akümba indang Islamic marriage certificate sayua liasü.

"Kibong akümtsü arishi küm agi matongba minority tetsürtem kangshia kibong kümdkaktsüba ken o ajak yamai dang asür. Aija alisangi tamasa tetsürtem dak tashiyim agi medemer aser iba sülen temerenshi nungi jenbotsü atema Islamic Nikah [marriage certificate] amshir," ta Bhatti-i ashi.

Police temi inyakangshidar, ajüsüa tia maka par kibong ya sensaker aser Khrista dak amanger asüba agi ochi obendang monguteti lir, ta Bhatti-i ashi.

"Mezüng osang agütsüba mapang police temi jenjang tapet agi asübo tanur ya takaraba nguteter lila, saka ken o menorang benokba ajanga aija alisang nem pa talidak melenshitsü atema mapang peria agütsüogo. Source kari onok dang ashiba agi, aija alisang yagi Sitara Islamabad-i anirogo aser onoki tang tena kong ali aji jangjatsü atema police nongshidar," ta paisa ashi.

Police-i Tayyab'er kinunger ana anir oa ken o ashishir chiokogo.

"Onoki maneni ketdangsurtem nongshidar, ajita asünungdang parnoki iba khuret ya temulung agüja abentsü," ta Bhatti-i ashi.

(Maneni tapak 7 nung...)

ANOGO ABEN TSÜNGREM DEN

Kümzük (T.Ken 116:1-11)

Tenüngsang Ken 116 shibai zülu pa timtem tia kar ajanga aoba iba ken nung zülu. Shitakba nung pa tasür liasü. Saka Kibubai pai ayimtenba angashi aser kümzük, aser iba indang pai zülu, "Ni Kibuba meimer kechiaser Pai kü ola aser kü temepishiba angashia lir, kechiyong Pai kü dangi Pa tenarong shitsür, aji asünung kopika ni taküm lidir ni papikaji ni Pa ajatsü" (t.1,2).

Tsüngremi Pa tila tanur dangi tenarong shitsüba noksa jagi Pai angashitsü asoshi asenok anasai aruba indang sayur. Junga aser jangjaa angashitsü asoshi tangari asenok den jembidang asenoki anasai orr angaa alir. Tsüngremi teti asenoki jembiba angashir, yaritsü asoshi teti asenok anasa alir. Ken züluri asenok dang ashir, "Kibubai tongmelang pur awabanga ayur; ni tajemzükba kümdkakja liasü, aser Pai ni kümzük" (t.6). Asenok kümzkütsü asoshi Tsüngremi asenok alidaki arur aser Pai asenok kechi koma südaktsüner yamaji kümdkaktsür. "Kechiyong tasü nungi kü taküm, nüktzü ayimba nungi kü nü, aser laoba nungi kü tetsüng nai kümzük" (t.8).

Ken züluri Tsüngrem taochi angu. "Kibuba taochi aka, aser temeshi lir; hau, asen Tsüngrem yimlibilem lir. Kibubai tongmelang pur awabanga ayur; ni tajemzük kümdkakja liasü, aser Pai ni kümzük" (t.5,6). Tsüngremi pa tasü nungi kümzük aser pa nüktzü kongdaksü. Pai tashi itdaksü aser malangtsü pa tetsüng kümzük.

Asenoka Khrista ajanga iba teyari kar. Paji taochi aser yimlibilem adokdak lir. Ken züluri ashi, "Tasüba lisü agi ni mesangbangogo" (t.3), saka tanela nung pa masü. Yisu pa melena asü.

Na tanü Tsüngremer tekümzükba nüngdaker asü? Pai ne dang angashir aser yarir, pelaang. Ne nüngdak ajak Pa teperiba teka nungi arur. Pa taochi aser yimlibilem lir. Pa tenüng nung jang; Pai na kümzkütsü.

Nicaraguan Catholic bishop ka küm 26 atema tepuokdaki yok

Tsüklai/February 14, 2023 (Agencies): Nicaraguan nung court kati Catholic Bishop Rolando Alvarez küm 26 dak tema tepuokdak ayutsü atema obendang agütsüogo. Pai linük anema inyakba aser osang tai prokshiba atema aija iba temerenshi agütsüogo.

Alvarez ya tir Daniel Ortega anemer ka lir aser tepuokertem chiokba nung shilem ka ama United States-i yokertem rongnung madentsü atema telemtetba agiba sülen pa nem iba temerenshi agüja liasü.

Matagalpa diocese nung bishop Alvarez dang senchia chiogo aser Nicaraguan indang lisopur jenjang aginogo, ta Reuters sangdong ka ajanga metetdaksüba den pa nem temerenshi agütsüba ya rasa meshi agütsüogo, koba March ita obendangtsü liasü.

U.S. State Department den angatetteper aliba ama putir pezü densema political tepuoker 222 chioka Brehostibarnü United States-i mintokba rongnung adentsü atema Alvarez-i memulungi liasü, ta Catholic News Agency sangdong ka ajanga metetdaksüba den pai Nicaragua nung dictatorship kübok Catholic tem maneni nongita yaritsü atema pai shima liasü, ta ashi.

Ortega-i, tepuokertem ya bendanger atema inyaksangshirtem lir, shirnoki linük sovereignty raksatsütsü meranger ta ashi.

Alvarez, shiba linük yimtiba Managua nung par kidang sota yua liasü, pa La Modelo Tipitapa tepuokdaki anirogo, ta UK nung amendaker aliba telok; Christian Solidarity Worldwide-i metetdaksü.

CSW indang Head of Advocacy, Anna Lee Stangl-i ashiba agi, Nicaragua toktsür aotsü atema tepuokertem atema lenmang lapoktsüba atema US dang kanga pelar. "Nicaraguan sorkari tepuokertem nem

meimchirtemi melitetsüsa jenjang nung tepuokdak ayutsü mesüra tashiyim agi linük toktsür aotsü atema maangka agütsüogo, koba tim masü," ta laisa ashi.

Bishop Alvarez aser tanga putirtem aser seminarians tema taoba küm August ita apu. Catholic Arogotem aser Ortega-i aniba sorkar tsüngda mangatettep adokba sülen parnok ya pua liasü.

Nicaraguan federal police-i ashiba agi, Matagalpa nung kibongtem tesunep nung toktsütsü atema parnoki Alvarez apu aser pa mapu asübo pai maneni tim masüba jenjang agir lila, ta Catholic News Agency-i ashi.

Nicaraguan bishop Silvio Baez, shiba Miami-i mintoker lir, pai Alvarez tamendakdak nungi masetshiba atema tenüngsang agütsüba den pa nem temerenshi agütsüba ya tim masü, ta tweet asü.

Ortega-i aniba Sandinista National Liberation Front-i amokbanger aliba Nicaraguan congress-i nongovernmental organizations 1,000 dak tema shibangtsüogo, kong Mother Teresa's charity densema lir, ta PBS-i metetdaksü.

Pope Francis-ia, Catholic Arogo lenirtem rishikangshiba ya shisabulua bilemba lemsatepogo.

"Nicaragua nung tensa ni kanga junga asandangdar aser kanga shisabulua bilemer, kong nüburtem aser institution tem densema lir. Yimjung nung akümtsübutepa alitsü atema nendak sensak asemtsü asoshi imla ataba lemsateper," ta pai ashiba Vatican News sangdong ka ajanga metetdaksü.

Nicaraguan nung obendanger Martha Patricia Molina Montenegro, shiba Pro-Transparency and Anti-Corruption Observatory züngsem ka lir, lai 2018 küm nungi tang tashi nung Catholic Arogo tem 190 ben amakba mangaoka lir, ta ashi.

AO OSHI ANGAZÜKDAK:

TANÜ ANGAZÜKTSÜBA OJANG



Otep

(n) ojang aser along balala agi oren yangluba (sentence)

* Kidang tsuraburtemi tanurtem dang Ao nung **otep** yanglu sayutsüla.

Oti

(n) mapa inyakba indang ashiba ojang (verb)

* Nisungi inyakba mapa indang ashiba ojanggi oti asütsü.

OLONG PAITEP # 6429

	1			2		3		4
5						6		
7			8					
						9		
		10						
11								12
					13			
					14			
15								

TIPIEN

- Balaka - (5)
- Aika shirangba - (4)
- Tar tatsü - (6)
- Nenü'er jabaso - (4)
- Sen latettsüba - (7)
- Tangar kübok alir - (4)
- Lon nung inokba - (6)
- Tzü ayimdak - (4)
- Ajok - (5)

LANGTSÜNGLEN

- Hai sür inyak - (4)
- Aor tenüng ka - (6)
- Ali telungi talangka lur - (5)
- Tebang kenyongi mazüoker - (4)
- Ken atema anenzükertem - (5)
- Toktepa noktak - (5)
- Sen - (6)
- Benjong agi - (5)
- Telung nung rizünga ayu - (4)
- Tebang nung enok - (4)

OLONG PAITEP # 6428 TELANGZÜBA

TIPIEN :

- Aben, 4. Artsü, 7. Lisem,
- Liwa, 9. Sarasadem,
- Aket, 14. Mangu, 15. Anünü,
- Ango.

LANGTSÜNGLEN :

- Aruli, 3. Balala, 5. Suwar,
- Belem, 9. Süjak, 10. Aonung,
- Dokan,
- Tinu.



ALOKBA ELECTION NUNG TAMAKOK NGUR RASAR :

Alokba : Saalaaa, nenok agent tem ya tamagitsü, katia list ka amer aruli sen meshir oli, ano ka aruli list ka sayuli sen meshir bener ayazükli ta, sen lakh sa lakh, crore aika nenoki chitsüogo saka tamakok angur rongnung ni tatempangbuba, sen shiba nemsä kwi-i agütsüar detail list bener arua satyuanng no, nenok ajak.

Sobangba : Aet ashir asi aji tamakoktsüa- war nunga tulurtemi injangküp, empty case bushir? Kodanga mepushir, yamajidanga electionjia!

- Lilir : WhatsApp



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- Tenüng :
- Tasoba anogo:
- Küm : 4. Class :
- School :
- Talidak :
- Salem osang :

BJP ya 'bulldozer party' lir: Congress lennir Gaurav Gogoi

Agartala, February 14, 2023

(Agencies): BJP ya 'Bulldozer Party' lir ta Mongulbarnü Congress MP aser Deputy Leader of Congress Gaurav Gogoi-ashi.

"Kodang nisungtem vote enoktsüdang Assam, Gujarat nungi police tem Tripura-i arur aser Central Armed Police Force melenzüker. Iba ajanga nisungtem tsübuteper aser vote meinoktsür" ta Gogoi-ashi.

"Onoki CAPF, Tripura Police, BSF aser tanga central forces mapa lemküka election tiptema

aser ochishia agitsü akhanger. Onoki PM Modi aser Assam CM'er state tem nungi police maginür. BJP-i ano küm pungu atema sorkar yimsü süra Uttar Pradesh nung ama Bulldozer ajanga sensakertem menüngdoktsü" ta paisa metetdaksü.

BJP ya 'Bulldozer Party' ka lir aser parnoki civil rights, democracy, constitutional rights agiener, ta Gogoi-isa ashi.

Nübertemi BJP sorkar atsüngdoktsü atema Left Front aser Congress nem vote enoktsütsü renema lir, ta paisa

shisem.

Left aser Congress ajanga taruba sorkar akümtsü ta CWC member aser AICC Tripura In-Charge Ajoy Kumar-ia ashi.

"Congress aser Left ajanga sorkar akümtsü aser ajak atema old pension schemes tenzüktsü. Iba election nung Congress metsübuttsü aser BJP-i ozüng alema inyakba tayang meküpzüktsü" ta pai ashi.

Taruba chief minister ji Tripura nungi asütsü aser Kokborok o Bengali oshi ashir ka asütsü, ta Gaurav Gogoi-isa metetdaksü.

MSCW chairperson-i NPP rally nung adenba atema EC-i ashishir

Shillong, February 14, 2023

(Agencies): Meghalaya State Commission for Women chairperson Phidalia Toi-i NPP party indang election sentong ka nung shilem agiba atema Election Commission-i show-cause notice ka agütsüogo.

National People's Party (NPP) candidate indang sentong nung Phidalia Toi-i shilem agiba video ka nung angu.

Jowai assembly constituency indang returning officer-i Toi nem show-cause notice agütsü aser anogo ana tsüngda telangzüba

agütsütsü mapang agiba video ka prokshia liasü. "Nai Meghalaya Services (Conduct) Rules 2019 anema inyakba atema kechiba nü nem temerenshi magütsütsü telangzüba agüjang" ta CEO-i züluba nung shia lir.

Women's commission chairperson ya sorkar mapa inyaker ka aser ta Indian Penal Code (IPC) nung lateta lir aser Meghalaya Service (Conduct) Rules 2019 ajanga sorkar mapa inyakerem political party mesüra sorkar den adenba telok nung madentsü tenokdangba agütsü.

Jowai NPP candidate Wailadmiki Shylla-i nomination papers file asüba anogo nung Toi-i pa den külemi rally ka nung shilem

agiba video ka prokshia liasü. "Nai Meghalaya Services (Conduct) Rules 2019 anema inyakba atema kechiba nü nem temerenshi magütsütsü telangzüba agüjang" ta CEO-i züluba nung shia lir.

Külen, Congress teshimtet telok kati CEO den ajuruteper aser candidate o Toi merenshitsu takhangba agütsü.

1970 küm ketdangtsür Yashpal Kapur-i yariba ajanga Allahabad High Court-i Indira Gandhi disqualify sütsü, ta Congress-i metetdaksü.

Format C-1

(for candidate to publish in Newspapers, TV)

Declaration about criminal cases

(As per the judgment dated 25th September, 2018, of Hon'ble Supreme Court in WP (Civil) No. 536 of 2011 (Public Interest Foundation & Grs. Vs. Union of India &Anr.)

Name and address of candidate : **A. PANGJUNG JAMIR**

Name of political party : **Bharatiya Janata Party**

(Independent candidates should write "Independent " here)

Name of Election : Nagaland Assembly Election 2023

Name of Constituency : 21-TULI (ST) AC

I, **A. PANGJUNG JAMIR**, a candidate for the above mentioned election, declare for public information the following details about my criminal antecedents :

(A) Pending criminal cases

Sl. No.	Name of Court	Case No. and dated	Status of case(s)	Section(s) of Acts concerned and brief description of offence(s)
1	Special Judge NIA DIMAPUR	CASE NO.: NIA CASE RC 1/2016, RC 01/2016/NIA-GUW Dated 18.08.2016 Chargesheet No. 01/2017	Order of Cognizance against him has stayed by the Hon'ble Kohima bench of the Hon'ble High Court of Guwahati vide order dated 06.08.2018 WP (CRL.) 4(K) OF 2018.	384 IPC Sections 25(1-b) Arms Act Section 7 & 8 NSR, Section 13 Drugs and Cosmetics Act Section 10 & 13 UA (P) Act, Section 39 & 40 of UA (P) Act. (Extortion, Acquiring Arms that has been specified in that notification of contravention of that section, Penalty for Subversive Acts, Punishment for carrying or possessing Arms, penalty for being member of an unlawful association and punishment for unlawful activities, Support given to a terrorist organisation, raising funds for a terrorist organisation.) Allegations are that while serving as a Govt. Officer in the land resource department of Government of Nagaland NIA alleged that I supported the the terrorist organization NSCN(K) and I have given government fund to NSCN(K).
(B)	Details about cases of conviction in criminal offences	NOT APPLICABLE		NOT APPLICABLE
Sl.No.	Name of Court & date(s) of order(s)	Description of offence(s) & punishment imposed		Maximum Punishment Imposed
NOT APPLICABLE	NOT APPLICABLE	NOT APPLICABLE		NOT APPLICABLE

Format C-2

(For political party to publish in website, newspapers, TV)

Declaration about criminal antecedents of candidates set up by the party
(As per the judgment dated 25th September, 2018 of Hon'ble Supreme Court in WP(Civil)No. 536 of 2011 (Public Interest Foundation &Grs. Vs. Union of India & Anr.)

Name of Political Party: **BHARATIYA JANATA PARTY**
Name of Election: General Election to the Legislative Assembly of Nagaland, 2023.
Name of State/ UT: **NAGALAND**

1	2.	3.	4.	5	
S I N O	Name Of Constitu ency	Name of Candidate	(A) Pending criminal cases		(B) Details about cases of conviction for criminal offences
			Name of Court, Case No. & status of the case(s)	Sections of the Acts concerned, brief description of the offence(s) of	Name of the Court & date(s) of order(s) Description of offence(s) & punishment imposed Maximum punishment imposed
1.	21-TULI (ST)	A. PANGJUNG JAMIR	Special Judge NIA DIMAPUR CASE NO.: NIA CASE RC 1/2016. RC 01/2016/NIA-GUW Dated 18.08.2016. ChargesheetNo.01/2017. Order of Cognizance against him has stayed by the Hon'ble Kohima Bench of the Hon'ble High Court of Guwahati vide order dated 06.08.2018 in WP (CRL.) 4(K) OF 2018.	384 IPC Sections 25(1-b) Arms Act Section 7 & 8 NSR, Section 13 Drugs and Cosmetics Act Section 10 & 13 UA (P) Act, Section 39 & 40 of UA (P) Act. (Extortion, Acquiring Arms that has been specified in that notification of contravention of that section, Penalty for Subversive Acts, Punishment for carrying or possessing Arms, penalty for being member of an unlawful association and punishment for unlawful activities, Support given to a terrorist organization, raising funds for a terrorist organization.) Allegations are that while serving as a Govt. Officer in the land resource department of Government of Nagaland NIA alleged that I supported the the terrorist organization NSCN(K) and I have given government fund to NSCN(K).	NOT APPLICABLE NOT APPLICABLE NOT APPLICABLE

Pelaba Lemsateper

22-10-1937

08-02-2023

Asür NOKCHIRABA PONGEN

Onoki teti meima aliba Asür Nokchiraba Pongen iba akumli wadang tembangba mapang onok den nübu, tamang sarasadem aser rongsen balala agi yariba kija, temolungertem, tembartem, kidanger, arogo balala nungi aser Lemjen Hospital aser Civil Hospital nung inyaker ajunga dang kinunger tenüng nung pelaba lemsateper.

Nenok kija shia dang pelaba melemsatetba asoshi sasa bilemer saka Tulusang Tsüngremi nenok ajak nem moajang ta sarasademtsür.

Temeim kinungtsü, chirnur, semchi-semnur, anükapang aser kinungertem.

Dhansiripar Ao Baptist Church nung Youth Director ka nungdaker.

1. Tebur asütsüla.
2. Tazüngba (Educational qualification) B/D or M/Div.
3. Küm asembosa Arogo nung inyakdangba nübo asutsüla.
4. Kibong maküm asutsüla.
5. Music/Computer meteta aliba asutsüla.

- Tongtepratep ajak March 15th 2023 tashi dang alitsü.

- Agüja aliba number nung tongteprateptsü akok - 9366115535 / 9863514986

ALI TAYOKTSÜ LIR

Nihoto, Naga United nung ali ka tayoktsü lir.
100 x 100 @ 150. Ali atoktsü menügdak.
Jenang tera ajemtsü. Contact no. 8014426873

Pakistan: Khrista dak...

(Tapak 5 nungi...)

Bhatti-i ashiba agi, minority teloktem nungi aiür chanutem aiben kangshia kibong kümdaktsür aser tamangba yimsü melenshidaktsü, kechiyong parnok kinungertem ya yimya agi sensakertem asür aser okadak ken o benoka raratsü atema parnok dak tashi malir.

Punjab province kong Faisalabad lir, iba tesem nung tetsür ka kibong akümtsü asoshi arishi küm tajemtibaji küm 16 lir aser Sindh province nung 18 lir. Bhatti-isa, federal sorkar dang Pakistan ajunga nung tetsür ka kibong akümtsü asoshi arishi küm tajemtibaji 18 kümdaktsütsü ayongzükogo.

Tashiyim agi tamangba yimsü melenshidaktsüba aser tanurtem kibong akümiba ken o ya Pakistan nung mapang talangka nungi beshia arudar.

Movement for Solidarity and Peace in Pakistan indang 2014 report ka ajanga Khrista dak amangertem aser Hindu nungertem densema religious minorities tem nungi tetsür 1000 shibo kümshia kangshia tamangba yimsü melenshidaktsüba den kibong kümdaktsüba sangdongogo.

Khristan tem talitsü majungba linüktem asangba nung Pakistan tang jenjang tenetbuba nung lir, koba taoba kümgo tibuba nung liasü.

MENUNGRA BILEMTETER



Suponglenla
Aso : 1937
Asü : 21 Nov 2017
Tsüpongrepba
Aso : 1 Jan 1932
Asü : 15 Feb 2022

Temeim Oba aser Oja,
nenaprongla onok nungi pilaa oaka nür
jala jabasotemi nena shisatsü tajung
aser temeim mapa menungraa
bilemteter.

Onok mesüa lia arudang nenati
omok dang temeim taochi taremsük
mapatem sayuba onok mulungjang
nung teti alitsü.

~ Temeim Jala, Jabaso, Semchirtem

Republican Nikki Haley-i 2024 tir election nung tokteptsü maparen tenzükogo

Washington, Tsüklai/ Taoba mapang lai Trump
February 14 (Agencies): yimya aija aru aser pa busemer
Taoba mapang South Carolina temi January 6, 2021 nü US
nung governor aser United Capitol sapangba aija liasü.

Nations ambassador inyaka Iba lendong atalokba sülen
alila Nikki Haley-i 2024 küm lai jembidang, election anogo
US tir inyaksü asoshi la nungi tenzükpa pa inyakyim ya
candidate ka lir ta puti otsü ajanga obendangtsü,
sangdongogo. ta shia liasü.

"Aremzükpa atatsü mapang Donald Trump
masü. America nunger tashi ita administration mapang Nikki
aser tejak tenteta alitsü mapang Haley ya UN ambassador liasü.
lir," ta lai campaign video ka Polls ajanga South Carolina
den senaktepa tweet asü. nung Trump jenjang tajungba

November ita Donald sayur, shibai 2016 küm tir
Trump-i US tir election nung shimsü asoshi nübuyim
tokteptsü sangdongba sülen tenzükba mapang iba state
Republican candidate tongtipur nung pai jenjang tajung
rongnung la ya tanabuba lir.

Tir asoshi tokteptsü atema nomination bushir Indian
American nunger rongnung Haley ya tasembuba alitsü.
Polling firm Trafalgar Group ajanga tawa survey ka

2021 küm White House agiba nung Trump ya
atema Trump den metoktep, mezüngbuba jenjang nung
saka tawa temolung shilem 43 aser Haley ya
melenshiogo aser putu tanabuba jenjang nung shilem
melentsü nungdak, ta lai ashi. 12 nung liasü.

Ano Republican telok nungi Taoba mapang tir asoshi
US tir menden asoshi tokteptsü tokteptsü janra nübuyim
atema shimsü nübuyim tenzükba Indian American
tenzüktsü imla alirji Florida nungertem rongnung Louisiana
Governor Ron DeSantis aser Governor Bobby Jindal aser
taoba Vice President Mike tang Vice-President Kamala
Pence lir. Harris nunger liasü.

Bengaluru Open: Sumit Nagal nem Wild Card Entry agütsü



Sumit Nagal

Tsüklai/February 14, 2023 (Agencies): India nunger rongnungi nungtugu tennis asayar Sumit Nagal nem Bengaluru Open 2023 kija asaya main draw atema wild card entry agütsüogo. Iba asayamung ya February 20 nungi 26 tashi asayatsü.

Arishi küm 25 tain taoba mapang India No. 1 asayar ya iba ATP Challenger event nung mezüngbuba wild card angusang lir. Iba asayamung ya Karnataka State Lawn Tennis Association (KSLTA)-i ayongzüka KSLTA Stadium nung asayatsü.

"Pongububa DafaNews Bengaluru Open atema Nagal nem mezüngbuba wild card pelashishia agütsür. Pa asayar tajung ka aser pai ATP Challenger title mezüngbuba idaki koka liasü. India nunger asayartem nem iba asayamung

nung alima nung asayar tajungtibatem den toktepa asayatsü atema sabang tajung ka agütsütsü onok bendanga agütsür lir. Nagal-i idaki kanga junga asayaogo aser idak nungi tenzüker pa indang career nung kanga junga asaya ogo. Pai iba maongka tajung agia tajungtiba asayatsü ta ni amanger," ta Bengaluru Open Tournament Director aser KSLTA Joint Secretary Sunil Yajaman-i ashi.

Nagal 2017 küm iba asayamung nung mezüngbuba ATP Challenger title koka liasü aser iba sülen pa indang career nung takok tajung nguyongaogo. Paisa, 2018 aser 2020 küm iba asayamung nung quarter-finals aser pre-quarterfinals tonga asayaogo.

"DafaNews Bengaluru open nung asayaba ya ni atema kanga tongtibang lir, kechiyong idaki ni mezüngbuba Challenger

koka liasü. Iba asayamung nung tokteptsü atema maongka anguba atema kanga pelar. Iba tetushi asayamung nung shilem agitsü atema KSLTA-i kü nem maongka agütsüba atema ni kanga pelar aser iba maongka ya takok tashi tajungtiba nung amshitsü merangtsü," ta Nagal-i ashi.

Iba asayamung nung taoba World No. 10 Lucas Pouille aser taoba küm champion Chunhsin Tseng na densema asayar tajung aika den Nagal asayatsü.

Bengaluru Open atema taruba küm asem tashi DafaNews title sponsor asütsü aser iba ajanga DafaNews-i yimti aser linük ajunga nung iba asaya renloka aoba indang sayuba angutsü.

Asayamung atema Qualifiers February 19 nungi 20 tashi asayatsü aser main draw February 20 nü tenzüksü.

Badminton Asia Championships: India-i Kazakhstan kokogo

Tsüklai/February 14, 2023 (Agencies): Mongolbarnü Badminton Asia Mixed Team Championships Group B asaya nung India team-i 5-0 agi Kazakhstan madak takok nguogo.

India nunger tarep temeyoktep asayar Ishaan Bhatnagar aser Tanisha Crasto nati mezüngbuba asaya koka tenzüker. Dubai Exhibition Centre nung India nunger tarep yagi Kazakhstan nunger tarep Makhsut Tadzhibullaev aser Nargiza Rakhmetullayeva 21-5, 21-11 agi koka liasü.

Tanabuba asaya ya tebur kija asaya asaya liasü aser H.S Prannoy-i 21-9, 21-11 agi Dmitriy Panarin ayong ayonga koka India team 2-0 agi tejakdang aküm.

P.V Sindhu, shiba taoba ita Indonesia aser Thailand Masters nung masayatetba sülen tang asaya tenzükerogo,

lai tetsür kija asaya nung 21-4, 21-12 agi Kamila Smagulova madak takok ngua liasü.

Tebur tarep asaya nung Krishna Prasad Garga aser Vishnuvardhan Goud Panjala nati Kazakhstan nunger tarep Khaitmurat Kulmatov aser Artur Niyazov na koka liasü. Tenati iba asaya 21-10, 21-6 agi akok.

Tatembangbuba asaya nung India tsürtem rongnungi rank tajungba nung aliba tarep, Treesa Jolly aser Gayatri Gopichand nati Nargiza Rakhmetullayeva aser Aisha Zhumabek 21-5, 21-7 agi ayong ayonga koka liasü.

India team Bodhbarnü UAE den asayatsü aser iba sülen Brehostibarnü par telok nung tatembangbuba asaya Malaysia den asayatsü. Iba asayamung nung telok ajak nungi tajungtiba team ana quarter-finals-i aitsü.

Australia den tanabuba Test atema Shreyas Iyer shimogo



New Delhi, Tsüklai/February 14 (Agencies): India nunger batter Shreyas Iyer, shiba teberem yirur anepalua liasü pa BCCI medical team-i temelaba agütsüogo aser pa Australia den tang asaya aliba tanabuba test atema team nung adentsü, koba linük yimtiba nung Hokolbarnü tenzüksü.

Tanabuba test asaya ya February 17 nungi 21 tashi Delhi kübok Feroz Shah Kotla Stadium nung asayatsü.

"Shreyas Iyer teberem yiruba sülen National Cricket Academy nung rehab tembangogo aser asayatsü atema BCCI Medical Team-i temelaba agütsüogo," ta BCCI secretary Jay Shah-i sangdong ka ajanga metetdaksü.

"Border-Gavaskar Trophy atema Mastercard Australia tour of India nung tanabuba Test New Delhi nung masaya tsüingda Shreyas team nung

adentsü," ta kasa sangdong ajanga metetdaksü.

Mezüngbuba Test asaya atema Iyer India team den Nagpur-i ao ajisiuka temang anepalutsü atema pa Bengalore nung NCA-i meyipa ao.

Taoba ita New Zealand den ODI asayaba sülen teberem nung timtem aliba ajanga Iyer masayai aruogo.

Arishi küm 28 tain Mumbai nunger asayar ya temang anepalua aliba ajanga New Zealand den T20I asayamung nunga masayateti liasü.

Tanabuba test atema India team: Rohit Sharma (captain), KL Rahul (vice-captain), Shubman Gill, Cheteshwar Pujara, Virat Kohli, Shreyas Iyer, KS Bharat (wk), Ishan Kishan (wk), R. Ashwin, Axar Patel, Kuldeep Yadav, Ravindra Jadeja, Mohd. Shami, Mohd. Siraj, Umesh Yadav, Suryakumar Yadav.

WPL: Gujarat Giants aser Mumbai Indians na mezüng asayatsü



New Delhi, Tsüklai/February 14 (Agencies): Mezüngbuba Women's Premier League (WPL) nung mezüngbuba asaya ya March 4 nü DY Patil Stadium nung Gujarat Giants aser Mumbai Indians na asayatsü, ta Board of Control for Cricket in India (BCCI)-i Mongolbarnü metetdaksü.

Hombarnü Mumbai nung WPL Auction takok ngua tembangba sülen BCCI-i WPL 2023 atema mapanglem sangdonga liasü.

"WPL mezüngbuba season nung league asaya 20 aser play-off ana anogo 23 tsüingda

asayatsü," ta BCCI-isa metetdaksü.

"WPL nung mezüngbuba double-header March 5 nü Brabourne Stadium nung Royal Challengers Bangalore aser Delhi Capitals na asayatsü aser nikongtsütsü UP Warriorz aser Gujarat Giants na DY Patil Stadium nung asayatsü," ta kasa sangdong ajanga metetdaksü.

Anogo ka nung asaya ana asayaba mapang mezüngbuba asaya nikongtsütsü 3:30 ako nung tenzüksü aser tanabuba asaya 7:30 nung tenzüksü.

"League nung tatembangbuba asaya UP

Warriorz aser Delhi Capitals na March 21 nü Brabourne Stadium asayatsü. Eliminator DY Patil Stadium nung March 24 nü asayatsü aser final ya Brabourne Stadium nung March 26 nü asayatsü," ta BCCI-i ashi.

Iba asayamung mezüngbuba edition nung Delhi Capitals, Gujarat Giants, Mumbai Indians, Royal Challengers Bangalore aser UP Warriorz ta team pongu tokteptsü aser team temi international aser domestic asayar tajungtiba alizüktsü merangogo.

India tsür Smriti Mandhana sen (3.40 crore) tasaktiba agi Royal Challengers Bangalore-i alizükogo. India team captain Harmanpreet Kaur-a Mumbai Indians puri crore 1.80 agi alizüka liasü.

Bendanger asayartem rongnung Australia tsür all-rounder Ashleigh Gardner aser England tsür all-rounder Natalie Sciver na Gujarat Giants aser Mumbai Indians nati sen crore 3.20 agi alizükogo.

BILEMDANGANG

"Lenir tajung kati lenir aniteter."